



INATSISARTUNI ILAASORTAATITAT / LANDSTINGSGRUPPEN

Nummi marstip 11-at 2008

Inatsisartut Suleriaasianni § 36, imm. 1 naapertorlugu Naalakkersuisunut apeqqut imaattoq matumuuna saqqummiuppara:

Matumuuna apeqqutigiumavara Inunnik isumaginninnikkut ikiorsiisoqartillugu naatsorsuutsinnikkut inoqutigiit akiligassaminnik malinnaasinnaaqqullugit aammalu inuuniutissaqarsinnaaqqullugit ikiorserneqartarnerat, allatut aaqqissuussiviginiarneqalersaannginnersoq.

Ullumikkut inuk/inuit aningaasarsiakinnertik tunngavigalugu immikkut naatsorsuutsillutik ikiorserneqartartut ataani oqaatigisakka tunngavigalugit allanngortitsinissaq/ naleqqussaanissaq Naalakkersuisut allanngortinnialersaanngilaat, imaluunniit nalilersoqqinnianngilaat?

(Inatsisartunut ilaasortaq Otto Jeremiassen Siumut)

Tunngavilersuut:

Tassami ullumikkut Inuk/Inuit suliffeqaraluarlutik aningaasarsiamikkulli annikitsumik pissarsisarnertik pissutigalugu akiligassaminnut tamakkiisumik malinnaaniarnermikkut ajornartorsiulersartut ukiuni kingullerni amerliartortut malunnarpoq, ullumikkummi inuuniarnermi atukkat tamatumani tunngaviusartut paasinarluni, immikkummi naatsorsuutsinneq tunngavigalugu akiligassanut malinnaaniarnermi aammalu inuussutissaqarniarneq tamatumani tunngaviusarmata immikkut ikiorserneqartussat ikiorserneqartarnerannik.

Tamatumanilu eqqarsaatigisariaqartoq aammalu arlaatigut iluarsiniarneqartariaqartoq tamanna isumaqarpunga, soorlu siuliani oqartunga immikkut naatsorsuutsilluni ikiorsiutigineqartut akileraarutaaneq ajornerisa kinguneranik, aammalu ikiorsiissutigineqartut ukiumut isertitanut ilanngunneqartarnerisa kingunerisartagaat tassaasarluni aningaasarsiat qaffariaateqarnerisa kinguneranik arlalitsigut eqquinerlutartartoq malunnarluni, inuillu taamatut ikiorserneqartut ajoraluartumik arlalitsigut eqqornerlunneqartarput, soorlu makkunatigut, illumut tapiissutinik pisinnaajunnaartarput, meeqqat tapiinik pisinnaajunnaartarput, aammalu ukiumi akileraarfiusumi akileraarutitigut akileeqqittariaqartarlutik, meeqperivinni akiliutit qaffannerannik kinguneqartarluni taamatut ikiorsiissuteqartarneq.

Tassalu ima kingunerlussinnaatigisoq siuliani taakkartukkakka tunngavigalugit pisariaqarsorinavippoq taamatut ikiorsiisarnerup arlaatigut aaqqissuussivigineqaqqinnissaa, pineqartunut taamatut ikiorserneqartartunut eqquinerlunnermik kinguneqartarnera pineqartut ilaatigut suliffimminnik kajungerisaarukkiartornerannik tamanna tunngaveqartinneqartartoq ersarimmat aamma.

Kikkummi tamarmik sulisinnaanerannik kissaateqarluta illuanik pisinnaasaannik oqimaattorsiuleralutuinarnissamik malitteqartittisassagutta tamanna pissusissamisoorinangimmat.

Aammalu tamatuma kingunerilersarmagu piumassuseerukkiartorneq tamakkiisumillu inunnik isumaginninnermik ikiorneqaannarnissaq atorusunneqarnerulertarluni.